



Eides-jentene treng litt hjelp – me vil søkja om kompensasjon til Eides kafé og handleri.

Me viser til utlysingsteksta på [Regionalforvaltning.no](https://www.regionalforvaltning.no) om statlege kompensasjonsmidlar til lokale verksemdar som er ramma av smitteverntiltak i Osterøy. Eides kafé og handleri har vorte hardt råka i fleire periodar av både lokale, regionale og nasjonale smitteverntiltak.

I tillegg har me til no falt heilt utafor andre kompensasjonsordningar. Kanskje det er vår tur no ☺ ?

Eides kafé og handleri ligg sentralt på Valestrand i ein restaurert sveitsarvilla frå 1904. Kafeen feira nettopp sitt 5 – års jubileum. Den har etterkvart fått mange trufaste og nye gjestar frå både lokalmiljøet, heile Osterøy og Bergensområdet. Nesten kvar veke dukkar det opp «nye fjes» i kafeen vår, som serverer kortreiste råvarer – der all mat er heimelaga.

Drifta er kanskje ikkje noko gullgruve – men etterkvart har me både greidd å betala ned på den store gjelda etter hus-restaureringa – og å betala ut løn til Eidesjentene.

Men Eides har vorte ein sers populær møteplass for både bymann og stril, for einslege, for familiar, ung og gamal – og ikkje minst for alle dags-turistane som dukkar opp. Alle dei gode opplevingane og tilbakemeldingane er meir enn gull for oss to.

I tillegg til ordinær kafé- og butikkdrift (gåveartiklar), så har me i fleire år hatt ulike kulturkveldar med både kunstutstillingar, konsertar, allsong og filmkveld.

Men så kom pandemien... og alle våre planar om kulturkveldar måtte setjast på vent. Men ikkje nok med det – kafeen måtte i periodar stengast heilt. Og når me har hatt ope, så har me måtta redusera talet på sitjeplassar med omlag 50 %. Sjølv om me har heve oss rundt: starta med «take away», reklamert med at gåveartiklane kan pakkast ferdig av oss med utlevering i døra – så har jo omsetninga i periodar vorte dramatisk redusert.

Spesielt den første nedstenginga i fjor ramma oss hardt. Slik at omsetninga for året vart kraftig redusert. I tillegg vart kafeen sittande med eit stort varelager når året ebba ut. På grunn av pandemien og manglande støtteordningar, så har me i år måtta ta opp eit likviditetslån for å betala våre leverandørar, offentlege avgifter og skatt.

Eides kafé og handleri er aktiv i Osterøy reiselivslag, i «Destinasjon Osterøy» og i samarbeidet «Smaken av Osterøy». Me er klar til eit utvida samarbeid med ulike reiselivsaktørar her lokalt som Bullahuset, Hamre kyrkja og Den hemmelege Pølsefabrikken.

Oppsummert:

- **Eides kafé og handleri søker om netto (eks. MVA) kr. 144 809,- i tapt omsetning.**
- **Fallet i omsetning for dei mest råka månadane er i snitt 56 %.**

Valestrandsfossen 16. mai 2021

Tone Vatle
Dagleg leiar

Lis Anita Pedersen Windt
(Sign)